




22-6523
67620731
=5



黔縣志卷六


人物志

閻若璩有言一統志不立列人物郡
物立也余謂志與傳別各史例也陳壽之志專為紀傳
邑志即邑史亦陳壽例也故人物有志豈惟激勸而已
哉然以激勸言所獲亦已多矣



武略	宦業
隱逸	忠節
藝術	儒行
寓賢	孝友
列女	質行
	尚義
	文苑





宦業

梁... 胡明星字太白橫岡人天監初爲國子生時詔定正雅樂
 選生徒數十人肄其聲容明星與焉樂成授湘東王府法
 曹參軍入爲太學博士累遷在太常卿高祖晚崇釋氏明
 星與侍郎周捨等上疏極諫不聽遂棄官歸隱居橫岡累
 徵不起明星里居黃姑墅見郭外溝洫不通乃傾貲募工
 穿二渠約十里許導城北溪水溉民田千餘頃其子文煥
 助父穿渠及卒於立廟祀之事載新安圖經見藝文志崇
 祀鄉賢

宋

邱濬字道源天聖五年登進士第因讀易悟損益二卦能通數知未來興廢早歲游華陽洞求為句容令歷官至殿中丞嘗語家人曰吾壽終九九後至池州一日起盥沐索筆為春草詩詩畢端坐而逝年八十一葬於九華山著述甚富見宋史藝文志嘉靖府志云舊志載濬於仙釋下言及殮衣空服謂屍解光祿大夫滕甫元發為太守記其事後數年有黃衣人持濬書抵滁州家人啟封持書者忽不見書云吾本預仙籍以推步象數謫為泰山主宰事涉渺茫不可據惟一統志特收濬於人物中故今遵之孫抗字和叔其高祖師睦避孫儒之亂棄廣陵來黟抗少孤力學博極羣書為文操筆數百千言天聖五年同學究

出身補來安簿洪州右司理寶元元年登進士甲科知晉陵縣移知潯州尋通判耀州慶歷二年擢監察御史裏行蠻唐和寇湖南以抗安撫奏事不合因自劾乃知復州又通判金州知漢陽軍青州稍遷都官員外郎提點江南西路刑獄儂智高反抗即出兵二千以助英韶會除廣西轉運使馳至所部智高方熾抗乃驅散亡吏民轉芻米又督守吏治城修械屬州多全而師飽以有功劳遷司封員外郎至工部郎中以皇祐二年卒於治所年四十五所著有文集百餘卷子適邈迪适邁適從王荆公遊年十四議論著書已驚人登第後終永州軍事推官邈嘗為縣令荆公

亦稱其好學能文自迪以下及孫略皆登進士第事詳王荆公安石墓志銘羅鄂州願傳見藝文志崇祀鄉賢

孫冲字子和熙甯六年進士知含山縣稱循吏律已甚嚴秩滿家人解其歸裝時有老僕畜一碣冲視之曰此非吾來時物命還之

程邁字進道南山人程忠壯公靈洗之後元符三年登進士乙科爲仁和尉以捕盜功改秩知西安縣調知鹽城縣宰相劉正夫薦之除提舉江西常平歲旱募流民浚洪州東湖水患爲息後入爲戶部侍郎除提舉措置河北路糴使以辦聞命再任繼除直秘閣以忤中使李彥禰職高宗

卽位召除左司員外郎俄遷太府卿提點郊祀事除集英殿修撰知福州建賊葉濃楊勅范汝爲等作亂詔能臣撫綏除知龍圖閣福建路轉運使邁且招且捕所向悉平惟范汝爲未下乃使降寇張毅守古田責以立功度大將辛企宗及謝嚮等終不能平賊密請王師航海不五日可至庶一戰滅賊章十餘上始從之賊平請錄死士後給脅從無歸者粟及田廬掩露齒選循吏撫養後松溪及汀漳有寇賴以平紹興二年召進徽猷閣待制知溫州黥平陽吏四十人他縣猾吏以次遁去上謂宰相曰程邁溫州之政光絕前後今之吏師也丁父憂服闋提舉江州太平觀俄

召赴行在力辭差知信州再除知鎮江府兼沿江安撫使
時鄱陽歲饑多盜上憂之進徽猷閣直學士知饒州條畫
寬恤三十餘事揭於州門民以甯息徙溫州轉中奉大夫
進顯謨閣直學士再知福州紹興十五年正月卒年八十
有七遺表聞進四官累秩左中大夫爵文安縣開國子著
有漫浪編五卷奏議表啟三十卷詩二百餘篇事詳羅鄂
州願傳程森家傳見藝文志崇祀鄉賢

黃葆光字元輝少孤刻意於學年十六居太學有聲縣欲
以應八行科辭不就從使高麗補將仕郎政和元年以銓
試高等賜進士出身調齊州司理參軍閱獄囚一夕遣數

百人通判以爲疑視牘無不當者上其事進秩修職郎後
爲左司諫以言事忤蔡京徙符寶郎七年除監察御史北
方歸命人李良嗣撰北夷錄平夷書大臣引之擢祕書丞
葆光刻之又條三省樞密院吏非元豐舊制者其大弊有
十革之歲省費數十萬知兗州方邵輒至國門求赴堂稟
議葆光奏請重竄之上悅面諭曰未嘗有人敢言此者又
論崇甯後增置兼局之費詔蔡京裁定京乃陽請一切廢
罷士論匈匈上疑不可行他日因雨澤愆期奏對言君臣
同心相濟然後可以寅亮燮理今師臣蔡京啟跋扈之心
太宰鄭居中少宰余深皆依違畏避此所謂天氣下而地

氣不應者章入不報京陰中以事謫昭州安置宣和二年
令自便尋以職方員外郎召未至復主管江州太平觀四
年知處州閣二歲除直祕閣再任疾將革聞蔡京罷喜動
顏色沒之夕家未有繪象索之民間得百餘本初葆光俸
餘俱以贖親故家無餘財郡人斂贖五十萬子由中卻之
眾爲請於朝官其一子詳各傳見藝文志崇祀鄉賢

胡汝明字傳道橫岡人政和二年進士歷南康軍教授無
爲軍士曹改秩後除宗正寺主簿建炎初通判鄂州幹辦
行在糧院賜對上稱其老成權監察御史不數日除殿中
侍御史時邊事少息建言乞經營太學作新人才以備中

興官使明年立太學又乞罷州郡添差酒稅數條多見採
納時新開米芾書帖唯賜從臣詔特以賜出知饒州致仕
事詳羅鄂州願傳見藝文志

汪皋會字元贊登紹興二年第授嚴州壽昌簿調建昌軍
教官創學宮留意教養改秩率醴陵邑自寇旱後民逃土
荒皋會撫以惠愛治爲最晉奉議郎致仕著文數十卷學
者稱醴陵先生

汪勃字彥及黃陂人年十八首鄉薦後登紹興二年第調
嚴州建德主簿長於吏治紹興十三年除太常簿入臺爲
檢法歷三院御史右諫議大夫兼侍講數有建白務合大

體遷御史中丞十七年除簽書樞密院兼權參知政事封

新安郡侯

宋史紹興十七年夏四月己亥以御史中丞汪勃簽書樞密院事十八年春二月乙未以汪勃

兼權參知政事八月丙申汪勃罷與此小異

與秦檜不合數上章求出以端明

殿學士領外祠凡六年復起知湖州為政安靜不尚鞭朴

未嘗妄費公家一錢民間鼓木為語家揭一本置坐隅曰

賢哲太守福壽千秋帝嘉之詔進秩三等比退居專以教

訓子孫收郵鄉里為務歲新陳未接必捐價出穀旁近數

郡賴之晚節及見其子作礪為太常簿孫義榮義端同登

第後有旨復龍圖閣學士會卒詔追復年八十四作礪別

有傳事實詳羅鄂州願傳葉忠定適墓志銘見藝文志崇

祀鄉賢

程叔達字元誠顯學邁之姪孫登紹興十二年第除興國

軍光化教授改秩仍典湖學擢通判臨安知通州諸御史

薦為臺主簿未三月遷監察御史乾道二年二浙大饑孝

宗分遣郎中御史檢察賑濟叔達按行臨安諸邑奏欲依

趙抃在越故事城郭外更於鄉村多擇寺觀散糜粥上大

喜謂執政曰誰肯為朕盡心如此趨對上迎勞曰卿賑濟

甚有勞績除右正言遷左司諫論和糴四弊除直敷文閣

知池州引嫌改衢尋改江西轉運副使易江東鄉部也即

家拜命邦人謂晝綉云放頻年和糴本錢與乾道七年秋

苗錢仍捐米數千石贍宣城之乏朝命檢實徽州雜錢因
究見驛料豆錢總多科八千緡卽蠲減先是徽州邨升卿
奏本州六縣稅比隣郡過數倍得旨蠲放後朝廷以漕司
與本州數不同委叔達親至州與守相度保明乞裁減絹
數於合納十二萬匹內與減二萬蓋通前所減爲三萬六
千餘匹淳熙初元除浙西提點刑獄辭行上曰朕欲畱卿
未可言去除宗正少卿太子左庶子崇政殿說書兼直學
士院三年兼中書舍人尋兼權給事中卽奏敬天愛民有
志事功三事以待親求去除直龍圖閣提舉武彞山冲佑
觀明年丁憂七年除湖南轉運副使九年再除浙西提點

刑獄又除秘閣修撰知隆興府進集英殿修撰帥洪五年
前後蠲除民賦爲緡錢二十三萬有奇爲米斛一十一萬
有奇談者以爲多於王仲舒云十三年八月上宣諭執政
程叔達隆興之政甚美與進敷文閣待制慶元二年特除
華文閣直學士封新安郡侯以三年七月卒年七十八官
宣奉大夫贈特進賜諡莊節生平著述有玉堂制草九卷
臺省論諫存稿十卷歌詩六卷雜文十一卷藏於家白述
出處大節則有四朝遺老傳子鉉郊恩授官宰饒州樂平
提轄文思院繼通守會稽母喪除服提轄左藏庫主將作
監簿莊節制終除太府簿大理丞守九江陞辭遽終於朝

錫以父恩補通仕郎班改丁內外艱凡三作邑通守甯國奉祠終奉直大夫從子森見文苑傳莊節事實詳楊文節萬里墓誌銘見藝文志崇祀鄉賢

汪作礪字必成樞密勃長子少有聲場屋領鄉薦入太學補承務郎授浙西倉屬江右帥幕主管臨安府城北右廂乾道初歲歉錄救荒功以作礪主奉常簿歷守延平府入對乞蠲興化三縣民丁米錢一萬四千餘緡除提黠湖北刑獄丐祠歸作礪居家必時製良藥以施病者市綿衾以施寒者又施棺收無以爲斂者卒年七十三

程渭老字少呂顯謨閣學士邁之孫以祖恩補登仕郎授蘄春簿淮南憲檄鞠龍舒管承議之獄管遣人重賂於道渭老正色叱之考驗得情竟論如法轉池州建德令歲荒乃自履畝具得其實申明蠲放極力摩撫臺郡交薦改秩除江西監司幹官通判邵州攝道州事奏蠲逋欠紹興二年差知復州轉朝散大夫除靖州卒渭老嘗倣司馬溫公祭儀跪拜獻興之節未始徇俗貧乏不能婚嫁者隨宜賙給生長富貴中能律身接物不異寒素書翰清勁自成一

家

汪義和見儒行傳

汪義端字充之作礪子爲叔父作舟後甫弱冠與義榮同

登第廷對第三人授奉國軍節度推官丁內艱服闋除太學博士遷樞密院編修太常丞權吏部郎起知秀州有形勢戶占數千畝不輸官賦責其輸而返其田紹熙四年除監察御史改除軍器監知舒州陞辭除起居舍人甯廟臨御差充賀金國生辰使還言虜爲北部所擾今和議雖未可違當密爲自治待時之策除中書舍人兼侍講遷給事中除集英殿修撰知太平州改甯國府進華文閣待制帥紹興義端念此邦和買之重倍于他邦奏疏極言下戶科敷之擾與代輸和買并五等未納之稅除徽猷閣待制丁母憂服闋起知婺州帥隆興皆丐祠知鄂州卒著有盤隱集奏議藏於家

汪義榮字煥之作礪子乾道五年進士知崇仁縣縣有豪猾素持令短長義榮至皆爲屏息遇早究心荒政丁內外艱服除差江東機幕幹辦諸司審計知桂陽軍郡經蠻寇焚掠之後城堞圯毀乃增築城樓申畫達道治以最聞除大理丞卒

汪必達字兼善自幼天姿警悟引筆落紙燦然成章見時習尙辭賦遂舍駢儷占經而於禮記爲尤長每出諸儒箋詁之外乾道丙戌省辟選生員必達冠首選司業文簡程大昌見其文驚曰吾州有士如此深加賞識月書藝行常

爲諸生右陞爲太學生癸巳以優陞上舍充學錄同弟必
進登淳熙二年第廷對入等賞旌一官初分教滁陽改岳
陽以師道自重所至人士歸嚮必達亦如鄉先生教人子
弟法用是士多有造改奉議郎知旌德縣爲政務教化有
父訟子者必達謂父子至恩忍以私庭語言聞官乎授父
以杖身自笞之遂感悟父子如初有以猶子爲後繼得孽
子乃黜之必達必復之不容遺斥郡境饑發廩賑糶并爲
文勉諭富民賙卹全活甚眾庾使陳士楚行部至境曰旌
德眞福地也以疾卒於官舍必進字止善初授淳安尉仙
居簿分教夷陵郡侯高姓者旅櫬索然遂倡僚屬以全其
歸又爲萬州教宰建平著邑政論五篇授江陵機幕元陷
襄陽江陵戒嚴有獻策欲焚沙市者必進正色排之通守
豫章擢登聞鼓院除太常簿知峽州奉祠

汪勳字鼎叔少尙氣節嘉定元年由上庠登第調婺州戶
曹改淳安尉適遭水患民廬漂沒亟命舟救溺賴全者數
千人授荆門錄事參軍所掌倉庫故有市例勳獨不肯受
調盱眙法曹力贊郡守劉焯撫循士卒同甘苦咸得其情
郡邑晏然寇不敢犯授廣西檢法兼提幹舊北銀綱有羨
悉納本廳勳獨歸公帑紹定初改奉議郎待次辰溪宰當
路以辰溪遠雜夷獠欲移辟峽之夷陵勳謂臣子之職不

當趨易避難辭之單車至邑吏畏民懷蠻獠帖服終於官
囊無餘貲同僚賻贈以斂勲前任廣西檢法時同僚贈詩
云不能巧宦官常小更拙謀身橐屨空聞者謂爲信然
汪綱字仲舉侍御史義和之子以祖蔭入官中銓試授鎮
江府司戶參軍調桂陽軍平陽縣令改知金壇縣親嫌更
弋陽縣尋丁父喪服除改知蘭溪縣抉摘如神繼知太平
縣主管兩浙轉運司文字未赴任內艱擢監行在左藏西
庫遷知高郵軍陛辭言揚楚二州當各屯二萬人壯其聲
勢而以高郵爲家計砦高郵三面阻水湖澤輿阻戎馬所
不能騁獨西南一路直距天長無險可守乃去城六十里
隨地經畫浚塹設伏以扼其衝又慮湖水可以入淮招水
卒五千人造百艘列三砦以備非常又尋范仲淹毛澤民
故蹟修築興化海堰及石礎函管以疏運河水勢部使者
以聞增秩提舉淮東常平因制置使獻言兩淮便宜軍國
大計其言切中時務淮東煮鹽之利半天下歲久弊滋帑
儲空竭綱抉摘隱伏既盡償所負又贏金三十萬緡餉事
賴以不乏進直煥章閣知紹興府兼提點浙東刑獄濬蕭
山古運河創牖江口以通舟車發巨室私圍湖田以滋灌
漑之利歲灌田數十萬畝辦租以數萬計復儲錢三萬緡
專備修築自是海田始固理宗卽位召爲右文殿修撰加

寶謨閣待制奏免越經總虛額錢九萬五十緡權戶部侍郎致仕特畀二秩守戶部侍郎卒贈宣奉大夫綱在越佩四印文案山積而能操約御繁爲文長於論事援據古今辨駁雄勁著有恕齋集漫存錄宋史論曰汪綱之遺愛在越先民所謂擇賢久任者固不欺我矣宋史本傳見藝文志崇祀鄉賢

汪繹字仲成提刑作礪之孫給事義端子以父任補承務郎監福建水口鎮分司建康糧料院越州蕭山丞擢知安豐霍邱就陞倅歷滁州建康府遷知興國軍未行召對極言守江之策除軍器監簿出守儀真未幾陞漕兼郡修築

翼城百餘丈內外二城相連絡民有所恃其後寇果不敢犯復爲水門水閘以通漕運人甚便之逆折叛酋李全之奸終任內不敢肆嫚爲民代輸租十餘萬緡進直秘閣知甯國府修學校理軍實葺官舍減輸苗斛面奏蠲逋賦又擢節浮費代民輸租一年居鄉置義廩賜宗黨貧乏平糶價居官厚遇親友卒於治所士大夫咸哀悼之

汪統義和子歷知江州陞對言江淮表裏宜篤意守淮毋徒守江計累除浙東憲節兼領閩帥擢節浮費奏免山陰

山陵折帛錢請祠卒竇志統以蔭除將作監丞知真州提點刑獄兼知揚州奉祠起知江州陞對畱直寶章閣後除浙東憲節節費糶浙右米六萬以廣儲廩

汪縝字仲理提刑作礪之孫侍御史義和子遺澤補承務
郎調宣城水陽鎮歷臨安鹽官丞授復州簽幕贊理藩條
多所裨益制帥趙方薦其才改調荊州僉判歷德安倅倅
廳財計優裕兩制常賦如期趣發前此濫額取贏往往掩
而歸橐縝以餘帑十萬緡上制司以萬緡助郡猶存數萬
與代者而已無所私轉朝散大夫知漢陽未及上而卒
汪綬字仲章提刑作礪之孫寺丞義榮子以祖澤歷知興
國軍撫御民兵創葺戎器補治戰船修屯寨增營舍制使
吳愈奏於朝擢知太平州訪求圍田利病創修圩一局效
范仲淹法日役千餘人因以濟其饑饉計修築官圩七十
五所私圩五百八十七所以治行聞進直寶章閣終朝散
大夫

胡崇字宗叟殿中侍御史汝明之從孫父正臣充郡學職
贄於金氏遂爲歙人幼孤與兄嵩事母至孝同登淳祐四
年第郡守饒虎臣立雙桂坊以旌之嵩初調鄂州教授終
湖北運幹崇初授句容簿制置使吳潛辟入閤幕事無劇
易悉委之轉文林郎制置使王埜辟充制幹俄充沿江制
機權通判江州歷官太常寺丞兼尙書右司郎官上疏言
公田七司錄櫃之非忤時相出知台州台爲賈似道鄉郡
一切以公正行之豪右莫敢干政與似道不合召至行在

力祈寢免得旨奉祠未幾差知撫州似道嗾江西安撫曾淵子侯崇至陰圖中傷崇見幾勇退寓居吳興龜溪之上宋亡徒步歸歛至元二十年終於家子桂發終安吉獄掾桂榮授將仕郎事實詳洪焘祖傳見藝文志

江寅簡字靖一江村人少與弟一鶚師江公萬里讀書於石鼓山俱登進士第寅簡性矜持嚴辨明肅寡合博洽經史尤嗜誦張子西銘因見知於橫渠五世孫日朝談經之餘語及時政利病剴切詳明除知涇縣先是宣涇連旱居民多濱江而漁佃食於池饒無歸念日執蕪稅無從徵催銓司難其令張以寅簡薦於朝竟授秩之涇到任乃稽冊

籍諭部民開戶逋戶若干及移徙地方文冊各保覆實無漏具奏懇免旱荒舊徵及議減新墾徵稅之數允之卽榜諭招徠仍示附近債牛秋成償值如各阻抑卽罪逋民違諭者繫之兩界均墾風聞逋者業復蕪治雨暘時若大田多稼民皆熙熙然若瘡痍之去體矣時日朝爲浙中帥幹管轄宣歙嘉寅簡不負所舉特封薦剡錄其招徠墾荒茂績請勅褒嘉進秩朝請大夫時賈似道秉鈞章鑑高鑄附麗據要途恨寅簡無問餽阻格不擢日朝還白政府高鑄曰若黷涇接境家納實賄官鈞虛聲幹帥何不詳察徧徇通家之私耶寅簡卽日白州解綬士民泣畱不得行歸之

日行囊如洗

明

汪致道字成德七都霞阜人幼備儻不羣師事倪士毅先生孝弟著鄉里至正十二年壬辰兵變以復郡邑功署黟縣簿丁酉明兵南下卽以所部義兵散歸田里邑令賢之禮請至仍委以縣簿率吏民築郡城民忘其勞郡守薦於朝授滁州全椒縣簿改監安慶湖池規畫有方中書省以才幹委覈鎮江等處民兵單騎往旣復命洪武元年陞知徐州蕭縣庶務咸理治爲諸縣最詳汪蓉峯叡墓誌銘見藝文志

胡壽安字克仁橫岡人洪武中貢入國學歷知信陽獲鹿新繁三縣延父老詢邑中利病而罷行之躬行原野勸民耕植不足者資給之常舉宋陳襄教民格言勸導性淡泊布衣糲食寢處止一紙帳後圃種蘆菔數畦以供賓客或充餽遺其子來省兩月烹_二雞壽安怒譙責之其子後亦率教三宰大邑未嘗攜妻子或以爲言壽安笑曰人疇不思礪名節顧以玩好聲色敗者眾矣矧婦人之性易蕩其心吾不欲其爲身累也聞者以爲格言考績赴京民泣送者數千事竣遂告歸事詳趙進士弼傳見藝文志

汪景明六都

人進士授江西道監察御史左遷宏農

衛經歷尋復監察御史巡按江西清理軍伍以廉能稱遷
廣西布政司左參議卒於官崇祀鄉賢

王靜字永靜八都珠川人祖仲祥嘗建貯書樓靜讀書其
中以貢授廣東道監察御史時值營造靜奉命自南北畿
甸以及河南陝西山西山東往來巡視軍夫工匠五年之
間克盡劬勞既而奉齎金符往西域市馬歷雪山崑崙抵
弱水所至七十二族往返期年永樂癸卯巡按湖廣激揚
有聲洪熙改元授敕褒贈賜告歸省尋陞漢陽府知府革
弊政貸逋負賑貧乏時獲強盜一十二人上司審允待決
靜廉得其實具申上司論脫被連無辜者五人府治郡學
加之修葺政暇尤篤意典籍謂朱文公小學年譜及陳定
字古今通略切於初學捐俸刊刻以惠其民尋以老致仕
卒

王俊得字大本靜之姪永樂乙未進士授福建道監察御
史丁內艱起復改山東道巡按河北持憲得體嘗除虎患
洪熙紀元巡按雲南不寬不猛民夷沾化黔國公沐晟甚
敬重之宣德丁未奉敕清理山東軍伍時蝗蟲傷稼父老
告曰但得驟雨可除俊得卽齋沐率屬禱於神翌日甘霖
傾注蟲隨以消及巡瀾東有土豪訟及無辜者數十人俊
得微服往廉得其誣搆之由擒置於法眾皆稱快九年秩

滿遷河南按察司副使奉璽書參理戎政於赤城未幾丁外艱南還朝廷遣使奪情陞廣東布政司左布政使比至操履端嚴識略宏遠遇事務盡其心歲餘嶺南十數郡之民皆帖然及覩祭禮儀節有未安者條畫以聞廷臣臆之卒於官所著有畱芳集詳劉方伯永清墓誌銘見藝文志

崇祀鄉賢

余徽字一經城西隅人中永樂庚子鄉試宣德七年授保定府祁州知州革弊安民務興教化正統二年州內麥秀兩岐表進朝廷旌異之凡州治頽圯學校廢壞舉加修葺四野不驚刑訟簡約莅政七年陞保定府知府卒崇祀鄉賢

胡誼字斯政北隅人由貢授福建泉州府推官到郡未幾鄰火延燒衙署風狂莫救誼取署內門扁盡投火中再拜自責忽雨至火息

汪灌一名貴字尚淵黃陂汪葵之子永樂甲辰由生員貢入國子監其時國子生例得差監巡按事適有南北二差祭酒以南差屬灌灌請北差祭酒曰北地苦寒南差可千金獲灌曰生有服叔在遠使由是相見所獲奚啻千金祭酒許之比至叔飢寒幾不自存灌解裘衣之贈之貲俾得謀生差畢不持一錢歸正統戊午八月選授遂昌縣知縣

縣有逋賦灌抵任卽捐貲爲償爲政愷惻平釋冤抑囹圄
幾虛民有爲非者開誠勸導率自陳過以求自新是年十
二月卒於官在任僅三月也民爲罷市祀名宦焉灌居家
孝友初補生員其母以灌善承色笑至涕泣不願其入學
有弟二人灌所置產悉與之共或諷止之灌曰易得田地
難得兄弟也今崇祀鄉賢祠

湯餘善字良夫由歲貢爲樂平教諭陞知湖廣孝感縣多
善政解組歸授徒於縣治之旁

王仕得字世祿城西柏山人以貢授刑部貴州司主事執
法平恕遇事勤慎進承德郎崇祀鄉賢

程瑞字忠孝桂林人正統戊辰貢任山東范縣知縣廉能
有聲陞濮州知州

余衍字文盛保定府知府余徽之姪孫以春秋中天順壬
午舉人授福建崇安縣知縣持身廉潔處事安詳不通關
節公廨清閒儉約趙清獻公抃嘗令是邑百姓以爲趙公
復來也歷俸六年政教振舉陞本郡同知未任卒士民思
其德立祠祀之今崇祀鄉賢祠

朱通朱村人文公九世孫也天順五年以選貢授河南歸
德州同知興利革弊銳於作爲州濱大河歲壞居民田舍
通請作外隄以防衝擊當事有難色通力以身任之凡度

地測壤工食力作皆親爲督理功成而民免河患因稱之爲朱公隄兩河風俗剽悍通率師儒勤教化興禮讓而俗爲之變成彬彬有儒雅風蒞任二年餘以勤勞卒於官囊無餘資同官賻之而櫬始得歸有許參政天贈紀略見藝文志

汪璿字舜璣黃陂人遂昌知縣灌之孫成化丁未進士知武岡州改陝州擢南京工部員外郎清理九江鎮江蘆洲大豪侵貧民業悉追還之有餽金求免者却之論如法復立條例以垂永久先在陝時有屬官應檄校應天鄉試請璿所知交名時姪潮正應舉不以答也以疾歸卒

王杲字日瑞柏山人由歲貢任湖廣大治知縣潔已愛民民立生祠陞四川漢州知州

汪明字廷瑞黃陂人成化間貢入太學授新昌縣丞有巨寇劫掠郡邑明討平之陞湖口縣知縣一日見羣鳥哀鳴於庭命人隨鳥往數里飛繞茂林升木視之見數十巢鳥卵未成雛訊之則明日伐是樹也召其民止之一夕夢大池側一人披髮帶水訟冤明日往池中搜之果得屍爲怨家所傷治抵罪陞知歸德州調建水州卒於道崇祀鄉賢余循字文德亦徽姪孫宏治庚戌貢授江西建昌府經歷凡四攝縣事持守一致有遺愛焉崇祀鄉賢

舒遷字于喬南隅人嘉靖乙未進士選行人都御史歐陽鐸議增山稅力勸止之擢御史著居官慎己二銘上疏言時事息苟且尙真實正士風又上備荒疏鑄之戶部按山西修舉鹽政上邊防疏築羅城以杜邊患後居母喪卒汪如海字汝會璿曾孫也嘉靖己未進士時錦衣衛陸炳方貴寵欲以女妻之如海不從人服其操任刑曹辨孕婦之死釋參將之冤出守九江廉介自持巨寇柯日迪聞而投服府城一面當水厯被水啣捐俸築庠樓磯護之遷河東陝西都鹽運使遂致仕

許天贈字德夫屏山人嘉靖乙丑進士知海甯縣躬履畝釐正田之無稅者豪右亦不假借陞戶部主事權北關以廉惠稱出守建甯疏古渠創建甯二衛遷兩浙長蘆鹽運使轉山東參政獄多平反卒之日遠近哀思之著有丈量尺北關志兩浙長蘆事宜詩經正義等書

江萬和字一中二都人嘉靖壬子舉人知桐鄉縣秉性清介與學清賦逋逃者悉招撫之平沈瓚等百二十人及張樽等七案之冤雪之有釋獄者獻二千金不受陞膠州守又陞魯王府長史年五十謝職歸

余岩春城西隅人嘉靖戊子貢授天台教諭清介自勵士誦其訓舊志云清修儒雅敷教有方祀名宦

胡文光字原中西遞人嘉靖乙卯舉人知萬載縣革宿弊
擒巨賊決兩省積獄築城垣修學校起養濟院立水次倉
巡撫薦之賜五品服俸陞知膠州兼理海運尋遷荆王府
長史加四品服以親老歸
吳子忠字誨甫六都人由舉人爲麻陽令政尙渾厚不事
煩苛戢強梗飭邊防以質直謫判甯海先是知州馬以清
丈均稅爲富民所訴朝廷下議之兩載不決子忠至酌處
調停眾皆款服築城堤民迄今思之

汪書字禹瑞黃陂人精治麟經由貢爲金谿訓導正己率
物捐貲濟貧以麟經大義授諸生金谿遂以麟經聯魁時
縣尹推公攝篆力辭不受陞吉安府永豐教諭督課不倦
科第以久湮復興後以周府教授致仕年八十八歲
江雲梯字天衢蓬廈人由舉人爲安陸令舉鄉約以維民
修黌宮以造士捐俸賑饑興利除弊擢守鄧川州鄧苗獠
雜處號難治雲梯至化誨馴服民賴以安至今立祠祀之
舒希周字公旦屏山人由選貢授榮澤知縣轉武甯縣有
循良之聲

孫志甫名尙以字行古築人嘉靖辛酉中明法科授南直
彭城衛經歷兩考有績隆慶庚午以都將作功陞湖廣茶
陵州同知攝州事州故有母不能於子遺書囑舅戒之舅

匿其書至母死利甥爲外府甥奉之稍怠卽持書愬之州志甫曰而姊固愛其子屬弟教之非屬弟殺之也甥不善事舅當笞若終持其書爲利非長者甥自責以謝舅而舅亦慚焚其書歡好如初州人與鄰人訟曲在鄰鄰令故抵州人獄非其罪也志甫不阿牒上反坐而令敗州師與衛帥爭道悍卒擁門鼓噪志甫叱之曰若輩敢辱師長何爲者獨不畏朝廷法乎諸卒覘其辭色凜然遂散去志甫爲牒請守署上使者衛帥免冠謝乃解州與永新鄰邊氓界兩省多亡命不可治志甫善爲撫恤而置渠魁於法盜賊遂息民多改行爲善越五載陞福建都司經歷州人攀轅不能去子元直以文學知名仕有能聲孫淇副榜授湖廣京山縣知縣濬選貢仕至廣西鬱林州知州俱能世其家志甫詳萬公國欽墓志銘濬詳龍公文光敘見藝文志余天爵字子修城西隅人由貢在江西廣信訓導三署縣事幹理多方陞廣東茂名知縣時征徭賊檄辦軍餉曉諭徭民樂輸國稅庭無留獄上官多委任之解任士民思其德立去思亭以誌不忘

汪如川字汝道如海之弟性嚴介由貢授滑縣訓導陞武邑教諭擢大城縣知縣權宦李松飛語陷人如川發之遂爲松所中傷未幾松削籍人稱其耿介

舒志學字時敏屏山人由選貢中萬曆戊子鄉試任廣東海陽知縣莅任三載政簡刑清陞知山東武定州州介省會供億旁午得疾告歸

舒崇功字謙夫屏山人萬曆丙辰進士歷知衢州府捐橘林之租罷雲霧山採木之議以抑奸商州人專祠祀之陞福建福甯道兵備副使卒於官所著有詩經講意

何其敏字元功由選貢授廣東連山縣知縣轉任山西榆次縣歷太原府岢嵐州興縣陞澂江府通判以廉惠稱

汪宗淳十都人任壽州訓導梁直指委以盤查各屬事舊例當受者分毫無取陞宿松教諭

葉元善字虛谷南屏人崇禎初由太學生授鴻臚寺署丞丰采嚴峻動必循禮齋居如對大廷振興學業倡明道誼有所積必周及親故貧乏者一時士大夫雅重之

國朝

史士傑字公升瑪川人順治丁亥進士知江山縣壤接浦城時閩地未平戎馬絡繹士傑區畫有方民以不擾縣又界連玉山值江右金王叛亂寇逼城下士傑率眾格殺數有奇功改蒙陰縣縣更凋殘士傑設法招撫變產自給解任之日士民遮泣

余起光字幼暉城西隅人前崇禎乙亥拔貢丙子經魁入

國朝任浙江泰順縣知縣到任踰月申請蠲逋賦民大悅俗喜溺女錮婢深勸諭之期年化行時海寇竊發溫州屬邑殘破無遺起光令鄉民入城共守堅壁清野海寇無所掠邑鄰於閩閩之山寇每突入境城中震恐起光以大義激勵防兵居民晝夜巡守經年而孤城獨完汪肇衍字念宏宏村人康熙甲辰進士改庶吉士丁未改刑部主事後與修實錄擢翰林編修壬子典陝西鄉試偕同考焚香告神以公慎自矢

程震號葦航桂林人由歲貢授松江訓導署金山衛學正造就有方時值海寇侵掠佐郡守率士民防禦民賴以安莅任五載致仕歸兩學懷德著有易述詩文集

舒華先字衢石明福建福甯道舒崇功之子也四歲父卒於官從母扶櫬歸居喪哭泣如成人禮事母盡孝養從寡嫂如母遺姪喪明給之產以資衣食性聰穎臨文義手而成尤善鍾王書法綽有父風年十六補博士弟子員二十五以選拔入都授山東萊州府通判督理德州倉儲政絕苞苴減差遣歲免諸色溢稅興利除弊冰清自守攝濟東道篆秉政三月吏畏民懷士歌樂育公暇以詩酒自娛所著有練濤集槐署日記等書

汪先登字誕于教授汪書之孫世治麟經由歲貢授雲南
祿豐縣令邑當九府要津苗民雜處又值米珠薪桂撫綏
爲難先登勸諭開墾安業加意學校人文蔚起征輸有法
剔弊愛民無所不至庚子入闈分校多得士中丞袁公獎
薦陞知鄧川州撫字勤勞病篤不起子庠生作楫萬里奔
任一見永訣上官貲助乃得歸櫬百姓哀泣路奠立祠祀
之

黃元治字自先黃村人順治間由廩生兩中副榜考選書
法繕寫

實錄成議敘以通判用初任貴州平遠府卽以修復文廟
爲急改判江西建昌府擇儒童之貧者資給之讀書署中
再補雲南大理府上官委修府志數月告成署景東府事
蠲俸倡修文廟攝浪穹縣事縣中河道堙塞水潦泛溢力
爲開濬復田千頃又署北勝州州民淘金爲業舊例呈樣
金金戶各有私餽悉揮去不受遷宗人府經歷戶部陝西
司員外郎時捐納例開吏胥因緣爲奸元治洞燭其弊無
敢玩法陞刑部山東司郎中多所平反出知雲南徵江府
舊有銅鹽二廠皆利藪所在終任不營一錢令老僕種蔬
以資日用民間稱爲青菜太守旋告病歸里先是其始祖
黃友仁創立義莊名曰厚本設集成義學教族姓子弟并

周貧乏年久殘毀及其父志廉欲葺義學復義莊建宗祠後堂苦無其貲元治皆承志成之其自雲南歸也囊無餘資有江甯甘姓者年已八十父子流落滇南元治挈之偕行蓋於艱難跋涉中尙存心利濟云所著有黔中雜記詩文等書徵江府入名宦祠崇祀鄉賢

胡世甯字一清西遞人工楷書得褚虞法康熙壬子拔貢廷試第一隨會稽張令於平水地方招撫僞官兵一萬餘人有功授河南開封府河陰縣知縣

吳鶚字羽騫號翼亭橫岡人康熙乙丑進士知山東歷城縣縣居省會兼衝繁難鶚省繇役弭賊盜使積賦自完逃囚自返悍卒自戢童試中有刑政者鶚奇其才招入署肄業公餘與論文且分俸助之後數年刑入詞垣自此文風丕振解組歸士民攀轅臥轍壺漿祖送者百餘里後有至九華者猶多略道而問安焉歷人之不能忘如此

舒正裕號屏岡屏山人由國子生屢試不售因母老考選福建延平府經歷治尙寬仁爲上游所推重丁母憂歸囊橐蕭然百姓咸思慕之

汪士琇字琪石康熙丁巳舉浙江鄉試知贛州府長甯縣長甯素少科目士琇至振興文教邱尙豐始中進士其後登賢書者科不乏人康熙癸巳充江西同考官生平嗜學

能文乙未歲以亢旱步禱得暑疾卒於官

周可登字鵬遠七都人家貧力學康熙丙寅以選拔貢於太學壬辰授建平教諭肅學規勤月課得士嚴文在決爲青錢之選果以丁酉發解著有學山文集

汪志備由貢生任山西神池知縣在官有能聲膺保薦調陝西永昌縣復調鎮番武威嗣簡發江蘇署淮安桃源江甯上元知縣

汪思昱字念揚宏村人由貢生知會理州勸學重農尤嚴私宰之禁遠近感化性嚴介屬吏有干以私者拒勿納卒以被譖鐫級去官士民懷之

汪之鵬字鯤化黃陂人父州同銜去端有義聲之鵬夙秉家訓勤學尙德乾隆十七年移學宮經營不辭勞瘁由

恩貢授豐縣教諭訓迪有法以名節激厲生徒時有諸生劉某爲邑役索賄不遂致得奇辱之鵬聞之申之學憲其黨大恐具百金求寢其事揮之不顧卒以白上抵諸邑役罪甫二年以老乞休豐人鐫其事於石勒諸道旁令毀之乃重勒於明倫堂至今存焉教諭戴錫爵爲傳事略

程浩字淼瀾古築人乾隆辛酉入籍永嘉邑廩生癸酉科選拔中丙子科順天副榜由中書揀發貴州通判補授丹江歷署府州廳縣十六任前後在黔二十年所至有廉聲

苗民亦皆感化丙申冬因鉛差引

見戊戌四月欽奉

特旨補授鎮遠府知府庚子引疾歸橐無餘財僅手繪苗疆風土百冊各繫之詩以寓勸戒曰黔中竹枝辭病痊改補戶部福建司員外郎未幾復謝病同食貧自甘閉戶著書老而不倦卒年八十有三所著有養齋小稿十卷四雷堂稿二十卷韻府補二十卷

胡時誥字康仲西遞人乾隆丙子舉人任青陽縣訓導時誥工爲文官課勤人士悅服從受業者眾學舍之外僦屋以居成就多士邑人稱之

程桂蘭字芳苑桂林人監生川運例府經歷乾隆四十二年補河南府經歷性勤慎上官檄調督河工事俱報績署澠池宜陽縣事有政聲又署登封勸課農桑務爲實政縣故有嵩陽書院賜額於宋至道三年二程子講學地四大書院之一也桂蘭爲振興置膏火士風丕盛又實稽普濟堂孤貧額以憂歸士民送者會於城隍廟咸以爲宰官於神明無愧也

汪思蔚字慶雲宏村人貢生幼隨父業遊於浙乾隆四十七年以川運例議敘任湖北宜昌府知府政治有體讞獄尤慎府屬興山縣民曾姓者因命案疑似梏械成招思蔚

研鞫知其冤白上官脫囹圄者三人而選幹捕緝正克巡撫姚公謂是案遽釋三人嫌過寬不稱職請改部用授工部虞衡司員外郎甫解任與山正克見獲迺攜印稟入都呈吏部應復原官以不願外留京職改營繕司承修天壇處事務感疾乞假歸僑居浙之西湖至嘉慶十五年無疾而卒年七十八

孫學治字贊平四都古築人乾隆庚寅舉人丁未挑發四川署彭山丹稜琪縣夾江黔江縣事補清溪縣知縣彭山濱江岸值水漲居民蕩析學治撫賑有方在琪縣自製文章與諸生相可否風流文采一時稱盛嘉慶元年任夾江時教匪滋事團鄉勇講守禦法邑以無虞三年至黔江地與楚苗接壤勦定後邑民流亡歸者分別戶口與之休息莅任三載民戴其德五年冬補清溪缺清溪爲衛藏建昌交會衝塗民夷雜處凡乘傳過者邑舊有公櫃承值經事者多私侵派撥里夫奸猾輒避匿移之窮民學治清理其冊籍櫃無侵蝕夫役之征必均民不以力役爲苦七年冬卒於官清貧無以斂百姓贖錢贖之聞於上官各助之始得歸邑人送其柩至三百里學治篤於天性弟學永歿勤撫其姪爲文章有英氣所著天香閣文不肯作陳腐語爲官明察不累民故人思之

右宦業

黟縣續志

道光五年

欽加同知銜揀發安徽知縣署徽州府黟縣事呂子珏
賜同進士出身安徽徽州府黟縣知縣詹錫齡

同修

人物志

宦業

程雲翰字秋羽桂林人乾隆壬子順天副貢生充正黃旗
官學教習期滿選浙江仙居縣令引

見調河南西平甫蒞任卽捐資興復書院延名師主講聽
訟明而恕治盜尤嚴不肯自逸嘉慶十八年滑縣教匪滋
事西平戒嚴雲翰捐俸金團練鄉勇設守禦策甚備縣當

孔道差役繁不以爲民累歲饑疫作詳請緩征殮埋撫恤
盡心力爲之明年大疫復請平糶未得請先出貲設局日
觸暑親往賑贍不遺一人竟以此致疾卒於官喪車去西
平士民犇走泣送自縣境至鄆城路祭者不絕其遺愛在
人可見矣

忠節

忠節

宋

盧臣忠字仲信登政和二年第建炎初由臨安府司理召
入遷右正言後扈駕至建康金使有迫近御舟者臣忠叱
退之失足墮水中數日帝求臣忠所在左右記其處以對
使人沒得其尸拱立如生帝憫其忠賜水銀以殮贈右諫
議大夫與兩子官羅鄂州願傳見藝文志崇祀鄉賢
曹文登崇甯五年第任睦州建德丞方臘之亂死於官詔
進秩三等與三子恩澤

曹夬崇甯二年進士任本州通判方臘之亂死於官

府志誤爲

休寧人且誤以曹
文事爲曹夫事

胡干甫西遞人總轄六州諸軍事乙公之孫當宋元交兵
欲繼祖志舉義旗以應勤王之詔戰死於福建延平府
汪一龍霞阜人國學上舍時有旨許太學上疏言事淳祐
四年起復史嵩之爲相一龍曰人倫天下之大本奪情起
用是以不孝令也乃同黃愷伯百四十四人上疏疏再上
不聽乃與愷伯等作捲堂文蹈海而去以生死爭之嵩之
遂不獲起後嵩之搆陷工部徐元杰劉漢弼一龍復同蔡
德潤等百七十三人訟其冤

明

王用三都人明初以力士校尉從太祖征陳友諒司旗鼓
鄱陽之敗友諒兵取其首去俄友諒至望見旗幟不動鼓
聲甚疾疑有伏却退既太祖至寨中空無人獨用屹然山
立歎曰天下有此壯士贈千戶蔭其子王琬授百戶世襲
舒榮都字曰俞屏山人萬曆丁未進士授中書舍人擢御
史神宗末年上三字疏口虛公嚴其要在於擇相其後言
邊務則劾督撫周永春等言門戶則劾通政賈繼春等兩
次巡按湖廣發奸摘伏時貴竹土司叛滇南不通榮都代
疏畫進剿之策亂賴以平熹宗登極翼衛有力魏忠賢竊
國柄榮都密謀於楊應山漣左滄嶼光斗將連名疏劾之

以丁父艱歸魏忠賢憾之黜將錄斥爲地短星榮都見事不可爲憂憤而卒崇禎元年追贈太常寺卿崇祀鄉賢

韓如愈字弗如一字唐山萬村人興化籍崇禎辛未進士知安化縣以廉能名士官安某與武將殷朝陽有仇誘至家剔去其目因徧行賄求免獨如愈不納卒抵之法擢兵科給事中都給事曾應遴如愈同年友也爲人傾險如愈欲劾之或言散員不當劾都諫如愈正色曰是黨同寮而欺明主也卒劾罷之又劾大將賀人龍臨陣逃乞立斬以肅軍政明年劾罷江西巡撫張鳳翮晉兵科右給事中管十二團營稽覈隱冒無所縱先是巡捕營兵半爲豪門奴隸及巨奸積猾冒名漁餉遇巡閱則雇市人乞兒充數或以緝盜爲名羅織平民罄其貲產與將領分肥民無控所如愈力陳其狀弊少止山東總兵劉澤清爲言官所糾遣人持賄刺取兵科章奏如愈發之澤清懼遺書幣求解如愈詈而麾之澤清恨甚十七年奉命督餉道出山東民有訴澤清肆掠者如愈復露章以聞澤清陰使人刺之或知其謀密告如愈且勸其微服而行如愈不從曰吾奉天子命微服失人臣禮因遇害崇祀忠義孝弟祠

汪文熙郭隅人以椽史授武昌府經歷廉能有才多著政績崇禎十六年張獻忠陷武昌前大學士賀逢聖死之時

文熙與通判李毓英巡檢戴良瑄俱被執罵賊不屈死之
孫光先古築人崇禎三年武舉後任儀徵守備從督師史
可法殉國難

胡雲龍字時際性耿介不與俗諧舉博士弟子以直道得
罪司教被黜崇禎末年江以南山賊竊據郡邑雲龍奮臂
一呼所至響應一日復石埭青陽二城遂以攻池郡爲賊
所陷然義不屈辱斷舌斲膝自若也邑人汪有光作秋風
辭以弔之

國朝

江雷字伯升二都江村人幼孤未冠居母喪哀毀明未鳳
陽逃兵入祁門肆殺掠延及邑界雷率眾擊走之順治二
年乙酉邑奴宋乞爲亂雷欲誅乞先葬其母召同邑江惻
等與汪京都以計殺乞乞既死賊黨忿甚雷謂眾曰公等
且避去吾獨當之遂自經於母墓旁林中乾隆初請
旌建坊祀忠義孝弟祠汪有光汪碧有傳見藝文志

汪京都字曰俞嶺下人負勇好義當宋乞之亂招集壯士
與江雷同誅宋乞乞既死雷自縊俞潛逸欲赴軍門請兵
以誅賊黨未至聞賊忿恚窮搜必得俞而甘心焉因慨然
曰請兵未必允吾恐族鄰先以吾故被禍也復歸未至家
遇賊黨數十人斫以刃究其同謀俞慷慨不屈且叱之曰

欲殺奴輩者我也與他人何與遂被戕而族鄰獲免於禍
休寧金師濂有傳見藝文志

葉萬四五都南屏人少任俠勇力過人當逆僕宋乞作亂
潛匿廁所伺乞出突刺之不中被害萬四爲衆捐軀事平
里人塑像以祀

王運午珠川人布政俊得裔孫邑庠生以孝義聞邑奴作
亂午剛正不屈爲賊所殺宋乞嘗重午遂手刃殺午賊同
時謀殺賊者如江完卿盧用光余日章胡調甫汪戴先胡
履旋舒曰敬朱應期韓登瀛胡宗魯江聖宇孫宗聖等皆
被害自葉萬四以下十四人以欲殺賊捐軀雖所謀未就
皆孔子所謂志士者也故併書之

葉萬生字道一南屏人少守禮義有智略家故有質庫值
明季山賊土寇連年不靖因言於父世卿曰寇將至矣無
多藏以賈禍也乃與鄉人約合券者不取錢還其質數日
而盡順治五年戊子三月十八日江西土寇王之貞破黟
城虜掠四鄉南屏村人男婦咸走匿吳家塢山中屢日不
得食萬生潛歸取餼糧以奉其父并偵賊消息被賊執問
以村人所在不言挾之以刃又置積薪上環之以火萬生
罵賊不絕終不言村人藏匿之所遂被害時三月二十六
也越數日邑人汪洪道率鄉勇殺賊賊遯去村人咸免於

禍

楊鼎成字新叔八都人少讀書通大義尤精書法客遊滇南以翰墨氣誼爲營將推重吳三桂叛僞將欲脅之助逆不從而死

舒芝采字兆瑞九都屏山人邑庠生康熙甲寅閩寇充斥暗結土賊秋八月由浮梁入祁防弁叛降城破晦日由祁入黟長驅至城民驚惶避山谷芝采出探遇賊於途賊劫之逼問居民避匿處所芝采不言且叱賊賊怒燎薪以焙之芝采挺身不屈罵賊愈厲時陰雨柴火不甚烈適官軍至賊驚潰芝采創甚越日卒迄今鄉人猶能說其罵賊義烈之概云


余俊字東年八都府均人居七都俊生而天庭開朗長益魁梧警欬逼人通醫術補太醫院官醫嘉慶十一年援例以從九品分發福建十二年署順昌縣丞十三年七月赴廈門軍營十四年八月水師王提督得祿出黑水洋捕盜俊從行水師追盜首蔡牽船圍之盜船高大激水灌外棹船滑不得上俊分領眾爭登之盜急擲火罐燒提督船提督傷俊被重創水師護提督船歸俊臥病廈門事聞奉旨以縣丞用既水師卒擊破蔡牽船溺之閩洋日靖而俊以九月傷亡

賜卹給雲騎尉世職依例襲

賜葬銀一百兩與祭一次崇祀忠義孝弟祠俊嗣子余承

恩

右忠節



儒行

宋

汪義和字會之

宏治以來府志及孫志皆作字謙之今據夷堅志改正

黃陂人與朱

子同為祝氏甥朱子答會之書云所寄大學愧煩刊刻跋語尤見畱意千聖相傳門戶路徑不過如此又云求其輔仁之助於今乃得吾會之於中表閒豈不幸甚其喜而勸

之如此義和學有本原為政務實效不務虛名知隆興新建縣時講荒政條畫備具視旱白府帥曰旱勢特甚已批

放八分矣帥怒其專義和執愈堅帥為變容從之擢淳熙八年進士第治縣有聲倅紹興連丁內艱服除守武岡每

大比附試於郡歲貢一名義和謂郡統溪洞民尙武健欲
變其習莫若崇學校科舉乃請於朝竟得闈貢闈增貢員
士子勒碑頌記秩滿除太常博士兼禮部郎中樞密院檢
詳館伴正旦使時慈福几筵未撤金使以樂請義和折之
曰國樂尙禁使人豈宜以此爲請虜慚而止除右司兼檢
討玉牒除起居舍人繼除侍御史兼侍講兩月卒按御史
兄弟與
朱子爲中表之親慶元初申嚴道學之禁義端引李林甫
故事以僞學之黨皆知名士欲盡除之而義和獨與朱子
書札往來講論道學特表章之見天理民彝之不絕
而紫陽道脈尙畱一綫於黟也朱子書見藝文志

元

胡斗元字聲遠其先自明經先生昌翼居婺源考川後族
分以十千名派斗元屬壬派六都西遞胡氏卽壬派裔也
斗元少孤傳易於朱子從孫前進士洪範日玩一爻七日
通玩一卦周而復始授徒五十年嘗謂乾專言善性也坤
兼言善不善情也乾之善世吾無及矣坤之積善吾當勉
之因自號勉齋蚤夜修飭懼辱其先尤以不逮養爲終身
恨春秋朔望拜祀像輒涕泣不能已洒掃塋壠老不避勞
卒門人俞洪等私謚曰孝善先生有戴帥初表元墓誌銘
見藝文志

胡炳文字仲虎孝善先生子也幼嗜學年十二夜讀不輟
父母恐其成疾數止之乃以衣蔽窗櫺端坐默誦凡諸子

百家靡不推究既長篤志朱子之學四方學者雲集其族
子浚建明經書院以館來學之士嘗爲信州道一書院山
長再調蘭溪學正不赴所著有大學指掌圖四書辨疑五
經會意純正蒙求爾雅韻語雲峯筆記於朱子易本義啟
蒙五贊皆有通釋春秋嘗爲集解禮書皆有纂述稿未定
門人藏之餘干饒魯之學本出朱子然其說多抵牾作四
書通以正其非又有講議二百篇文集二十卷東南學者
因其自號稱雲峯先生私諡文通有汪子翼幼鳳傳見藝
文志

汪泰初字希賢七都霞阜人家世以儒學相傳泰初承家
學聞休甯倪道川先生士毅之賢築室里中禮請爲諸子
師且請先生奉二親挈家來居焉日與諸子講明朱子之
學一時名儒如陳定宇櫟趙東山泐汪環谷克寬皆與游
又於所居之左構遺經樓多集經史以便來學之士詳見
倪道川士毅汪希賢行狀及羅教授倫遺經樓詩卷後序
見藝文志

明

孫寬字伯容古築人元末隱居不仕洪武初常師事倪道
川先生之子尙綱尙綱爲黜教諭每閱數日必至其署執
經問業信宿而返慨然有志於古人之學不欲爲文章士

十五年知縣郭衡薦寬應經明行修之舉徵至京師與鄭
韜等召見賜錕未授職次年卒於京邸未竟所學士林惜
之有邵訓導誼墓誌銘見藝文志

汪士濂霞阜人號雲隱處士家世業儒其先大父泰初構
樓貯六經延倪道川先生教諸子訓經於樓著四書輯釋
後樓不戒於火俸經燼而四書輯釋手稿獨存士濂不墜
先志重新樓以貯經且謀刊輯釋以表章絕業日與名師
益友講求刮磨六經之義事詳教授羅倫遺經樓詩卷後
序宣德二年重修儒學士濂首先捐貲五百兩郡守崔彥
俊作記刻其名於碑陰

李希士字聖始七都人邑庠生少年見先儒語錄云學問
須心上做始得卽負笈入張公山屏筆硯默坐觀心後與
鄒守益湛若水創中天書院以講學自號見韋所著有三
經約言會講錄諸書晚年所學益粹欲紹考亭之道脈與
海陽金文毅聲創書院於桃源以館四方學者一時志學
之士翕然宗之今遺址尙存

韓懋德字鳴起七都人邑庠生與李希士等建中天書院
會六邑士人講求經義輸田立戶以祀先賢復創建家祠
聚族講約以十禁戒其子弟著有先覺集

孫濟聘字希尹古築人少孤善事母笈註孝經朔望常焚

香披誦時新安會講大旨非良知莫宗主教諸賢多姚江
高座濟聘憫之慨然以道自任講明聖學以紫陽爲標準
平生與人和厚律已端嚴鄉人咸稱之曰真儒先生乾隆
二十五年

旌表崇祀忠義孝弟祠

汪濟字君楫霞阜人邑廩生克承家學早歲自力於道靜
重寡言以誠敬爲本以孝弟爲先湛甘泉若水與李見韋
希士諸人創興中天書院大會六邑學者相與闡明聖道
濟值會期雖病必赴又創里仁講會作六歌以勵俗學者
翁然宗之所著有繼善錄達觀語錄培裨文集皆與聖道
相發明焉

汪偉字位三霞阜人崇禎中恩貢築室深山偕兄弟四人
勵志聖賢之學窮經明理蘄體諸身不專攻舉子業每月
朔望謁先師率弟子誦孝經歌詩習禮所著有太易解廣
孝編聽石吟天潛講義等書

汪鼎字紹實巖下人研窮經學不肯降意於場屋聲病之
文休甯縣知縣祝世祿聞其賢禮請之講明孔孟程朱之
理使縣之學者得所宗焉

汪宗訊字君疇巖下人少孤奉母孝與兄宗諒友愛弗替
性嗜學結廬復山之巖涉獵經史貫穿古今聞鄒南皋倡

學江右負笈問業嘆曰道學正傳其在是乎歸而杜門不出窮究理學以程朱爲的居母喪哭泣盡哀三年未嘗見齒所著有秋鴻草蘧廬草獨居錄證學吟等書士林宗之汪有恒前志皆作有常字聖基霞阜人邑增生性爽朗披覽務得大意而以反躬踐實爲事所著有經義注釋涵虛閣草等書皆所以發明諸儒未盡之旨

王巖英字伯實南郭人初業賈一日讀賜不受命慨然有感棄賈歸耕以事親守身爲本務聞湛甘泉若水主南雍教偕仲子鳳至南雍從之遊時年五十餘矣湛曰真有志者也與之語頗有會心知躬行踐履操存省察爲爲學之要年逾八十孜孜不倦

程文明淮渠人性淳厚六歲繼叔宗巖家貧力作好讀朱子小學嘗磨豆作腐手一編朗誦不輟致水滲豆渣叔怒撻之流血猶不釋卷叔奇之復使就學平生言行以小學爲準嘗語人曰細行不矜終累大德晚年與弟文運徜徉林壑之勝賦詩以相娛年九十餘猶日與子姪輩講論小學及卒遺命以小學爲殉子祖舜好讀書身體力行

汪文宗號慎齋篤親睦鄰樂與人爲善建光德樓讀書其中以列聖傳心爲主踐履致用爲功頗得爲學之要暇時誦陶詩及擊壤集翛然出塵埃外常手錄先賢格言以訓

鄉鄰子弟一時志學之士咸就正焉

舒希武字懋功屏山人自幼聰穎七歲能屬文年十九補邑庠生篤志力學博洽經史七首院校九試棘闈督學滄溪黃公聘掌白鹿書院教嚴學規崇正學四方從遊者甚眾同里門人許天贈位列大參子志學仕至知州

王張顯字達卿郭隅人性溫行醇學富文贍教授生徒歲百餘人兩舉修英宗孝宗實錄治家有法子弟冠婚必行家禮族有貧不能自給者助之使勤生有二孤女育以嫁之死無所歸者爲收葬焉常語子弟曰吾事可告諸天者然後敢爲故謹書趙清獻公語於壁兄張榮號棠軒倜儻豁達以才智間捐資解忿至今稱之張顯季子大度領嘉靖戊子鄉薦有文行

朱存仁字體元朱村人文公後裔布衣理學六經四子及濂洛關閩之書探索融會務在躬行實踐萬歷閒諸儒講學推爲壇長遠近來學者戶外之屨常滿生平著述有乾一子性理宗旨觀心錄岩溪家訓等書事實詳明經孫時新行述

江之寶字位卿蓬廈人廩監生生平博學閱覽徧窺子史而尤邃於易所著周易元備前輩林欲楫楊紹震吳世翔序而梓之行於世

王鋼城東隅人正德時偕王大度舒希旦同爲邑諸生肄業紫陽書院與王舜臣唐皋黃訓汪潭輩闡明朱子之學言行醇正不愧學者後鋼當貢讓於友至嘉靖己亥選貢未仕卒希旦屏山人嘉靖中選貢歷官至福建泉州府通判有實政

余心字曰丹少時以朱子所註四書謁教李見韋希士於中天書院剖析問難多所發明遂師事之希士晚年復欲創桃源書院於石門墨嶺之間以館四方學者每憂其湫隘心與休甯金聲及同志七十二人釀金鳩工而希士謝世經始於天啟壬戌之仲冬落成於癸亥之季秋顏曰時習堂翼以廊房藩以花竹琴書几研酒樽茶竈之屬莫不畢具復置山業腴田以資供應考道之士雲蒸鱗集彷彿紫陽規模可謂善繼其師之志者矣

朱之英字仲德九都朱村人邑庠生刻意爲學通五經雞鳴則起澄心默坐得性命之旨與石埭桂大璉本邑友人汪敦敬孫淇及兄之彥姪正學講學林厯書院一時名儒翕然向風所著有纂選古遙集剖晰詳明暇時歌詠以自樂怡然終老不求聞達

國朝

汪有光字謙子黃陂人邑諸生性敏而慤嚴於義利修德

不求人知爲文務資實用中歲卽棄諸生業與休甯張膽
爲道義交相與講道石林三十餘年所著有東岸草堂類
語讀史碎言批點檀弓孟子黟縣山水紀略

孫漢字廣思古築人邑廩生服膺寡過未能之言自號蘧
庵平生刻苦爲學四子六經披吟不倦至諸子百家亦究
其原流而必以程朱爲宗主性淳謹篤厚與人樂易無城
府其言行實表率鄉閭嘗推本顏子之不校孟子之三自
反作吃虧歌使人易曉里俗遂少爭競之風晚年蔬食布
衣蕭然一室署曰懿戒軒猶伊吾不倦所著有孝經集解
蘧庵詩草子錦敦行能文克世其學嘗作懿戒軒八箴以

訓後人

胡士育字基仁城北隅人邑廩生梁太常之裔也勤修好
學富於立言幼侍父佐安吉州著有藎餘堂稿隨父移臨
沂著有餘清館集及歸益以著述爲事所言務關世教不
尚浮夸之詞所著有性理標旨野史彙錄黟山古蹟往哲
詩森玉庭集兼山草堂詩餘等書藏於家


舒度字超凡屏山人邑增生事親有孝行性尤耿介不妄
取與苦心向學門弟子日益眾父其芳嘗著周易會通證
明本義度善承家學而於朱子所註四書用力尤深著四
書會通剖晰先儒之說最爲精詳往往發其未盡之蘊年

諭八十講論不倦壽至九十三而終

汪廷榜字自占黃陂人少業賈至漢口見船楫相蔽數十
里江波浩淼忽心動曰文之太也有如此乎歸而讀書能
深思所爲文或過審繼又務爲平易久之乃始務爲中正
之文讀書鍾山書院從梅氏得句股法由是通算學中乾
隆辛卯第二名舉人爲人直而婉見人善獎之有過則規
之能使必改所至前輩皆加激賞教後進有法補旌德訓
導歲饑力陳民疾苦得賑引疾歸自重所爲文不妄交嘉
慶元年舉孝廉方正病不赴試自號仰山學者稱仰山先
生卒其徒學使萬公作墓誌銘見藝文志

李日新字聖銘十二都景溪人歲貢生品端學粹說經經
經一以程朱爲宗出其門者率多言規行矩之士同時有
貢生邵榮桂字燕山與日新爲道誼交亦以修身明理爲
務一時士風澹樸皆二人之教有以延之也

右儒行



本縣

海一浪士風高難者二人

頁半滿葉林字燕山與日源然能前交亦以多具則也

路一以野米為宗出其門者李之官與許敬文士河相尋

李日陳平與從十二番是為人所賞上品以學其精

黟縣續志

道光五年

儒行

汪元攀字步瑗黃陂人邑廩生少孤事母兄甚謹性嚴重鄉里敬憚之衣冠不正者遇諸塗必避去有為不善者輒相戒曰爾不畏步瑗先生知耶然介而不激待物以誠不顯人之過有善獎之如不及故人皆樂就之從其遊者諄諄以先行後文為教文溫澹雅潔有先正風少時讀賈誼治安策三過背誦不誤一字其敏如此


汪廷榜事實見前志嘉慶十九年安徽巡撫部院胡克家以通經致用樂道安貧咨部題請奉


旨入祀鄉賢

胡紹琪字芝友西遞人歲貢生候選訓導宅心誠懇為學
堅苦篤嗜濂洛諸儒論說薛文清讀書錄非有故未嘗離
書冊應事耐煩雜遇所當為義形於色有不得不以責人
家庭雍睦無詬誶聲其教人以朱子小學為先年逾八十
猶勤講授早起晏寢率以為常遊其門者於學多知所向

云

葉學期字舜康南屏人邑諸生既冠始從胡紹琪習儒業
性鈍經書必熟讀百遍背誦百遍一日觀陸清獻公三魚
堂集潛玩久之慨然以躬行實踐為務行止坐立皆有軌
則事親孝與人以誠族黨有事必先期往不避勤勞布衣
蔬食多以為迂惟歛縣葉敦嘗與講論書疏往來不厭





孝友

宋

許遂字伯通唐睢陽太守遠五世孫也會祖儒不義朱梁
 自雍州東走隱江南山谷中終身不出祖稠仕南唐參德
 化主軍事父規好道家言嘗羈旅宣歙閒弟逃迴居祁門
 遂居黟縣早孤事母盡孝鄉人勵其子輒曰汝獨不慚許
 伯通乎祥符中封泰山加恩羣臣逃當遷以讓遂乃以遂
 為將作監主簿按規三子遂逃迴逃迴居祁門遂居黟縣
 瑗為作許孝子傳云黟人可據也今池州府志以規為貴
 池人甯國府志以遂及俞為宣城人皆因馬令南唐書云
 規嘗羈旅宣歙閒其後人亦
 多分居宣池故兩郡互載之

多系志

卷六

人物

孝友

目

許俞字堯言遂之子也少喪母事父以孝謹聞供給甘旨
晝夜不怠父之所欲雖千里必致之與妻子共食麤糲晨
夕事父必盡珍異父年垂八十謂曰覩汝登科之後沒於
地足矣大中祥符五年果登第授洛陽從事父疾沈篤俞
晝夜供省澣濯必躬親之父喪摧毀幾致滅性士流服其
孝道制滿詔超資授揚州從事嘗知大冶縣事詳胡安定
先生瑗許孝子傳羅鄂州願許長官傳見藝文志

俞康直俞家園人嘗流寓丹陽先世有業在錢塘族人擅
其利康直不問會他族訟官來歸康直與其弟弟曰吾父
兄不之有吾烏乎有之亦不受卒與族人康直舉孝廉方
正爲睦州通判後監洞霄宮崇祀鄉賢蘇文忠軾有監洞
霄宮俞康直郎中所居四詠見藝文志

盧鏗盧村人諫議臣忠六世孫也爲郡學掌儀居於郡城
母唐病危藥莫瘳刲股食母母隨以安郡守魏公克愚嘉
歎上溯世美由掌儀之孝推諫議之忠上其事於朝建忠
孝坊於郡城東北隅以厚倫美化也坊燬於元元貞乙未
年九月逮皇慶壬子年十有一月重建歙縣尹張侯身任
之事詳元儒陳定宇先生櫟重建忠孝坊記見藝文志
元

汪元字元善霞阜人四歲哭母哀毀如成人事繼母以孝

間昆季三人元居次稱友愛長篤學研經史習賦詞庠序
試多穎出值宋鼎革隱居鄉里父喪哀毀終制無違禮立
身待人以古爲師重義輕利非其道一介不取周急鄉閭
無倦當景炎丙子軍變羣小竊發肆屠燎元所居鄉安堵
無虞至大己酉夏四月十二日元無疾與家人訣怡然而
逝事詳元儒陳定宇先生櫟墓志銘見藝文志按舊縣志
元爲明朝人今據定宇先生所
作傳岩處士汪公墓志銘改正

明

汪葵字拱陽黃陂人生值元末隱居不仕每歲蓄芋數百
石負運入山不知所爲如此者十餘年後元亂兵變邑人
竄匿無所葵引入深山村舍宛然部分居處拆牆墜爲糜
食之蓋累歲蓄芋所築者又性孝父疾衣不解帶者二年
父疾篤葵號泣於庭庭鳥銜草墜其前葵拾草瀹湯飲父
父疾遂瘳自是每晨散粟飼鳥終其世不絕乾隆二十八
年奉

旨崇祀忠義孝弟祠

汪敦屋字義忠霞阜人幼穎敏性至孝以人材徵辭不仕
客游壽春忽一日心驚胸如物觸急歸數月而母逝屋時
年近七十痛不欲生喪葬悉以禮弟敦仁字思傑重修遺
經樓講明聖學以紹前休後以賢良徵赴部選尋病卒

汪朝京字錫之黃陂人性醇資敏博學能文領嘉靖丙午鄉薦母卒廬墓羣鳥畢集父爲樂平令卒於官訃聞跣足扶襯抵和州渡江中流檣櫂俱折朝京叩天號慟倏風澆入淺水咸謂孝感及門人姜寶嘗從朝京受春秋獲售後寶分校禮闈朝京呈部改經恐爲寶所物色其尙氣節如此

余枝華字廷譜城西隅人天性純孝二母俱逝事父凡飲食必親烹調嘗而後進數十年不少懈迨父九旬枝華亦年七十侍疾卧榻逾年衣不解帶裊褥汗穢必躬親澣濯居城汲水維艱庭閒忽湧泉水以供汲人咸異之至今有

孝感泉遺址及名人詩贊

舒壽安字依仁屏山人性淳樸敦古處事親孝友愛二弟永樂時充里長有解皇麻之役壽安以二弟不任勞瘁且未有子身獨任之跋涉關河歸塗猝病至金陵卒於旅次初壽安欲葬其親卜地於姚村術人李得貞曰此誠吉壤惜青龍中斷將不利於伯氏壽安曰卜兆期妥先靈苟風藏水止復何求況二弟子孫獲蔭猶吾子孫也遂毅然葬之後仲季支裔繁衍科甲聯翩而壽安後一綫綿延今亦寢熾人以爲孝友之徵云

汪德修字拙齋黃陂人由監生任巴磁二州同知署磁州

事有廉聲事親至孝父早逝哀毀幾死色養二母友愛二弟垂老不衰課子孫以詩書尤善屬文弟德明德孚

汪德明字鈍齋幼孤力學補邑庠生入監事兄如父恩遇弟姪平生不言人過有貸不能償者取券焚之知縣陳以行誼聞錫以冠帶子尙功領鄉薦

汪德孚字訥齋監生天性孝友養母盡誠敬遇疾衣不解帶敬二兄垂老無閒言每歲歉或雨雪連旬輒傾廩賑貸遇鬻子者其母哭欲投水急爲出金贖之

汪惠民字士孚霞阜人邑庠生尙實修不務浮靡性篤孝友父疾籲天請代父沒痛絕於地每逢忌日必齋戒而泣觸手澤哀思不已雖片字亦珍藏焉

孫隆字世興古築人童時人家塾聞講有子孝弟章輒喜謂孝弟分內事不孝弟不可爲人及長耕讀養親不應科舉每言聖門之學以躬行實踐爲功宏治十年令府州縣正官保舉山林隱逸之士府縣俱以隆應隆力辭不就嘗建支祠以祀支祖寬率宗黨子弟歲時習禮其中教以孝弟爲人之本并書家訓以示後人嘗建古築關東亭

余朝卿字心葵城西隅人廩膳生員性至孝母葉氏病癱瘼艱起止飲食必親扶掖垢必親澣與弟友愛無私財文行推重一時後任碭山縣教諭致仕歸

汪聲揚字君聞瑪川人積行端謹尤篤孝友一日讀書樓上聞父病急趨墜樓覺空中有人翼之而下嘗鬻腴田數百畝資兄宦游撫諸姪如己子兄老飲食必與其及沒哀慕不已鬱鬱不逾月而卒

何德新三都人母苦節家貧德新採薪養母母病刲股以療母喪廬墓三年

王汝棠性至孝父病痢醫藥罔效棠刲股和羹以進父病頓愈及父沒事母晨夕不離左右孺慕之誠邑人稱之子賓明邑廩生亦篤孝友父疾不愈籲天願以身代母病侍湯藥衣不解帶夜恆數十起無怠愛弟真切衣服飲食必與其周給族中婚娶祭葬人咸稱其德

朱有定字靜之朱村人幼失怙恃八歲能以至性感格繼母盧氏及長推產讓兄事詳尤太史侗傳見藝文志

周昱字南山縣前八邑庠生家貧事親能養志親病躬視湯藥不解帶者月餘兄幼時疾廢力業贍之終世愛弟尤篤三世同居無閒言知縣陳申聞旌扁

汪必振父疾刲股兄弟三世同爨

舒其芳屏山人母病與妻江氏同刲股療之後江氏病劇孫紹復亦刲股和藥以進人稱純孝之報

朱正綸字理之朱村人性至孝父病祝天求代刲股和藥

病遂愈

李如榴十二都景溪人年十三父病密禱于天願以身代
割股和羹以進父病尋愈後母病又再割股十餘年中凡
三見焉又有郭隅胡太臻割股以愈父疾胡振安父疾篤
割股療之王甯程文廣割股救母

國朝

楊國銓八都人家貧傭力以供甘旨早喪母事繼母如所
生後父母沒廬墓三年

朱之光字惟實朱村人隨父旅于六合父病熱狂夜溺井
之光夢驚覺亟從井救之出越日割股和羹以進父病遂
安六合知縣洪煒爲之傳見藝文志

程首登字邦仕桂林人順治歲貢親沒廬墓三年後年老
疾篤子見日割股進藥療之

舒啟標字玉立屏山人母許氏有腹痛疾每發連旬啟標
旦慕呼號求醫不效割雙股療之母卒哭泣三年未嘗見
齒詳訓導徐道昌傳見藝文志

舒拱薇字時行屏山人母早喪竭力事父凡有時會雖在
百里外必先致之父而後敢食父喪三年不離墓所遇友
人難不惜破產相周有逋於公者舉家流離拱薇傾所有
以代完納

汪琦字忠一庠生父病篤嘗糞糜股及歿哀毀致疾卒

胡連瑞西遞人順治乙酉逆僕倡亂執其父欲殺之瑞哀號願以身代賊感至誠卒免於難父疾衣不解帶事繼母如所生與其兄推產讓財友愛之誼白首彌篤

楊榮卿字體仁父病劇割股和藥父病獲痊

楊懷泉八都人母疾籲天割股以進沈疴頓起

朱永曦字象臣朱村人業儒母病篤割股以進病遂瘥

汪鉞字秉虔年十四割股以愈母疾及年四十七復割股療父康健倍前又有庠生朱功懋者善人朱善性也嘗割股以療其母汪氏

余聯振城西人祖克乾以孝友聞聯振事母至孝母病衣不解帶者一年病篤割股救之

程宗旦桂林人字伯勤事親溫清無缺親病割股和藥祈天請代

余大來城西人家貧父商於楚十餘載無音耗大來竭力奉母後聞父歿跣足千里扶柩歸母老病癱奉侍不離左右丙戌院試居首准貢以母病十年不應選人稱其孝

史國禎字君祥父早喪事母孝寓居昆陵夜忽心痛遂倍道歸而母果病時年近邁甲猶割股和藥母病旋愈

楊汝礪字尙質八都人邑庠生父寢疾三年衣不解帶親

歿哀毀骨立同時以孝稱者瑪川庠生史臣梅源人歐陽東鳳歐陽覲鳳南屏人葉元清八都人楊璜柏山人王天有及其子世瑞五都人李世守其前志不載地名者又有楊同春舒尙標江夢皋

舒啟震字長公屏山人邑庠生性孝母病衣不解帶籲天割股子尙瑛邑廩生尙位乾隆甲戌歲貢俱以孝友見稱葉其荃字孟蘭南屏人康熙庚午歲貢與修江南通志親歿廬墓三年

史朝安號仰屏瑪川人性孝母病劇割股和羹母病遂愈經營所獲悉與諸弟共立篝燈田以勸學致弟姪成名程達字于上柏林人早失怙賴母江氏教以成立及長淹貫百家所著有席珍錄處鄉曲醇和嚴謹無疾言遽色爲人排難解紛悉出至誠鄉人德之羣推爲祭酒有兄弟四人季弟早逝遺二孤自延師逮完娶悉爲區畫曲慰母心母年登九旬有八達逾七旬朝夕不離母側色養備至殊有萊綵之風母卒卜葬日適於其地遇白鹿之瑞觀者以爲孝德所感孫遷邑庠生舒夢龍字雲秀九都人父年八旬目瞽數年醫藥罔效焚香祝天割雙股和藥以進目復明壽至九十無疾而終兄弟貧俱竭力以濟

汪輔字公旦黃陂人性孝友居喪茹素三年服賈金陵淮
海閒數十年所積悉以分弟遇族黨中有鬪訟者必勸息
而後已子瀚由貢生授兵馬司副指揮捐賑建祠多行善
事

許選城西隅人性純孝母疾刲股和羹以進知縣江公既
入旌給純孝事親扁額

胡紳字書存西遞人附貢生父庠生光祖爲人勇於義紳
每先意偕諸弟力成之三黨益以親繼母韓氏失明窮於
醫藥紳晨夕祝天舐之兩月目復明乾隆四十一年奉
旨建坊崇祀忠義孝弟祠

吳嘉會字萃秀橫岡人其祖得宜以光祿署丞卒於都父
方搜疾嘉會孑身詣京師扶櫬歸葬父病篤刲股和羹以
進及歿痛不欲生因念從弟二人久客無踪父感念成疾
乃於營葬除服日周行數省訪獲歸里讓產授室族黨咸
稱孝友勿衰

何嘉騰三都人康熙五十一年母病危篤刲股以療及卒
哀毀盡禮既葬廬墓側三載宗族強迎歸乃刻木像以事
饒顏二令俱給扁獎焉

葉凌雲字西侯五都人母病篤刲股以進母遂痊
葉榮濟字廷佐亦五都人父病衣不解帶者七旬割股療

焉

倪廷松字松五七都里安人貢生性孝友隨父寓常州父病月餘衣不解帶父歿扶柩歸葬廬墓三年事母色養備至恩撫庶弟成立乾隆三年奉

旨建坊旌表入忠義孝弟祠

胡其恕字益吾六都人邑庠生雍正癸卯赴鄉試未至省聞父病星夜奔回延醫調治夜夢神與語錫年一紀後十年父歿朝夕哭泣辟踊無閒三十三日氣絕復蘇連呼吾父者三嗚咽而卒

黃琳字玉林宏田人國學生性至孝母病刲股和藥以進母遂愈邑令黃家甲給額旌獎

朱洪培字天益朱村人曉鍼灸與弟洪理同客六合洪理臥病值大水洪培及子樹循抱洪理痛哭鄉人乘筏救之得活逾年洪理卒培撫二姪成立樹循亦以父所遺財與二弟均分焉

汪世顓字俊卿黃陂人業儒事親篤孝年十九刲股療母疾母竟病亡閱三月世顓以毀卒

余海山槐溪人生一歲而孤家貧編竹爲活售業休甯以事母故迎母於休甯城奉養至八十一歲卒海山下葬母於休甯山頭廬墓盡禮海山雖習手藝而知大義乾隆戊

申蛟水暴漲浮屍流棺漂露滿野卽歸告母捐貲拾埋者
骨殖八十餘具慷慨好義卒年五十一歛曹文敏有長歌
贈之載藝文志

韓必珪字玉章十都人性孝友亦能成人之孝友嘗客粵
東有爲鹽埠邱姓釋兄弟相怨事

舒裕陞字堯階屏山人舉人事父兆耿以孝聞母朱氏患
目疾遂瞽裕陞和氣愉色先意承志數月雙目復明事兄
友愛垂老無閒言叔貧窶生養死葬皆裕陞任之生平以
氣節自勵足跡不至公庭嘗捐貲代其族人納糧選泰州
學正卒

胡立舉字公篤郭隅人附貢生善事親能以禮母年老欲
斷葷事佛立舉幾諫不從跪泣三晝夜母感而止立舉父
昆季三人俱葬杖鼓山伯父早喪子遺孫一人爲僧立舉
尋之歸清其遺產爲授室使承祀立舉兄弟三人兄早卒
弟中年卒善撫其姪置祀田造杉篙嶺月塘茶亭修橋施
藥施棺有善人目其卒也遺屬以兄弟相失爲恨死必同
穴合葬骨肉相依也

胡常基橫岡人父善炷客死溧陽常基年甫四歲及年十
四卽往扶櫬歸卜葬開穴有古槨亟止之讓而之右堪輿
言左吉不從曰吾寧不得吉地毋驚古墓也遂掩而奠之

事母以孝聞母以苦節得

旌表常基祖元格嘗於夾剪亭拾遺金待其人還之蓋有
隱德者

余文熾梓川人事親孝父老病腸瘡出吮之而愈

孫選字青獻古築人生員四歲而孤母苦節教子嚴稍不
悅選必長跪俟霽顏乃起隨母事王父母盡禮選以教讀
爲生爲人淳謹自守克慰母志子引之興之皆生員應鄉
試興之病危引之亦病撫興之哭曰天乎願弟瘳而我死
已而引之竟不起

吳伯貞橫岡人居母喪廬墓三年兄未有子而負風疾伯
貞祈禱願以身代兄竟獲痊嘗倡修橫岡木橋及潯陽山
路

程志達字采之桂林人武生性孝謹出嗣伯父玉弟允遷
早卒善撫其姪見知縣施公源所作傳詳藝文志

吳鶴鳴字蒼聞六都人生員幼出嗣大宗家故貧鶴鳴儉
衣食積束脩入葬大宗積棺生父卒鶴鳴慟傷任其事事
生母孝有一兄二弟撫其弟最友愛嘗同臥起問飢寒弟
歿養其遺孤兄客死哀號數百里迎櫬歸事孀嫂如母鶴
鳴以孝友聞其數學先德行後文章故爲可傳

楊尙聖字祈山八都人幼失怙日負薪易米奉嫡母生母

後居母喪致失明兄喪撫其姪及賈於江西多義舉
孫瑚字寶厓古築人少和謹自勵節操父洪維以尋弟故
旅於楚粵閩浙閒數載未歸瑚奉母肫篤母疾躬禱夕不
假寐母教之嚴或塾課未完懼母怒必屏息長跪母前母
意回始退就塾凡出入飲會必與二弟俱及長爲諸生父
命就學於鍾山院長盧抱經先生後應順天試乾隆四十
七年薦舉

欽定四庫全書三分總校悉心讎對未終而卒以子刑部
奉天司郎中士梧

覃恩誥贈中憲大夫

葉舟六都人生員母患瘋舟侍疾者二十年未嘗稍離兩
兄俱早逝舟事孀嫂盡禮

金宗曜字聚三金村人貢生父目瞽宗曜舐之而明又嘗
爲母吮癰亦愈兄喪撫二姪宗曜常賑族鄰饑埋露齒有
善行修宗祠立祀會亦可稱云

許紹修字敬亭城中人其兄紹俱客死蜀中紹修年六十
餘潛然日不及吾身往覓兄骨不得歸矣齋錢數百閒關
入蜀扶其柩歸時清溪知縣古築孫學治亦貲助之

余世光際村街人父客廣東有病耗世光往省之至則父
前卒扶櫬歸廬於墓母病歸侍祈以身代母病愈享年八


十餘世光於修宗祠亦其倡首云


范世錦字文溪叶里人爲人重厚父惟忠客荆溪病世錦往視割右股療之痊繼以母胡氏病復割左股求療聞病人糞味不變者可治卽嘗母糞而母竟不起世錦亦以毀卒

傅有通石亭人父久客有通亦少賈於外至固始遇其父同載而歸父患疽有通吮之立愈後數年父卒母得瘋疾撻有通往往流血而不離左右母不食亦不食衣不解帶者年餘始獲痊有通友愛其弟無私財

鮑永勝五都人母病六年侍疾無懈容從兄卒撫其遺腹子成立與以產業之半焉

右孝友





黟縣續志

道光五年

孝友

汪純粹字惇士黟縣人由商籍補杭府學生性孝友少時母病衣不解帶者數月病劇顛天割股和藥以進母病頓瘥著有孝慈備覽

鹽法志

嘗秉畿字建中屏山人性溫厚家貧父遊楚十餘年不歸秉畿年十五持零丁帖間關尋訪幾徧楚疆資斧乏絕至常德府遇父於旅次問答既審哀請父歸母病日三年秉畿朝夕舐之而愈居鄉教授生徒有貧者輒不受其束脩出其門者率多謹信之士

程陟泗字魯泉桂林人國子監生性孝友父歿殯葬盡禮
母年高侍養不懈有疾奉湯藥不暇食母病少愈然後食
弟諸生陟洲監生陟淇友愛備至陟泗治家有法少長四
十餘人皆和輯無間言

王廷拔字元鏌柏山人天性純篤事父孝事繼母如所生
侍疾歷久不倦親歿家貧舉債爲弟受室倡置黃衣坦義
塚族黨稱之乾隆五十六年前令胡舉鄉飲藩憲周給匾
曰賓筵嘉善壽至九十二歲

汪世文字可章四都黃村人少孤家貧性孝母病危割股
以進前縣張君護教諭戴君錫爵贈匾曰孝行可風

李兆舉性孝友有時食必先進父母然後食父母歿廬墓
三年事諸叔父如所生歿殯葬盡禮修葺祠宇週恤族鄰
勸爭止訟鄉里欽之

林學善字吉人章溪人監生幼失怙事母孝家貧兄早逝
無子遺三女衣食婚嫁善身任之孀嫂歿殯葬盡禮有妹
歸俞而寡嘗給薪水以濟其乏妻父亦早逝無子迎妻母
至家供養妹及妻母死皆厚其棺斂鄉里稱之

葉大猷橫岡人監生有至性事繼母陳以孝聞陳守節年
至七十大猷力爲請

旌以慰其志幼失生父能自立與兄弟事生母友愛備至

里中有兄弟構鬪者必爲和解或出財以全其好

王嘉擊字濟源百戶人幼孤母病瘋疾擊客歸見妻事母不善屏妻異處自侍湯藥親滌糞穢飲食起居不離左右逾二載母歿喪葬如禮擊歿已久至今訓子者多舉擊以爲法云

韓社忠萬村人少孤家貧臃腫不勝力作行乞養母間市酒肉少許以進母有戚容輒歌以慰之歷四十餘年母歿營葬訖未一年哀毀而卒

莫廷章月塘人習竹工性愚而孝遇不平不肯下父母叱之則俯而退父病危醫云不治章禱於神割左股和羹以進數日父病愈值酷暑章不解衣父詰之諱以他故強解之始見其割痕於是前縣秦聞其事以不有其身四字贈匾獎勵

汪學爲洋澗墩人父病瘵垂危學爲割股和羹以進父頓愈延至五年而後卒

奚孝童名元照謝村人性醇厚侍親疾匝月不解衣後父病殆醫不效默禱割股和藥以進忍痛強顏色家人無覺者父病既痊偶見其割痕始知之其時年甫十四年十五受室行合巹禮忽嬰重疾卒

胡元啟城東人姚元可城西人皆幼孤兩人之母病醫藥

不效皆割股以進母病皆愈一城稱兩孝子

葉大興字耀堂六都人性孝友知大義兄病亡與母哭子喪明與百方慰解調治復微明父母疾不離左右臥不解帶立祀會以保墳坐齊拜埽服兄客歿貧甚興歸其柩并葬其父母兄嫂歛曹宮保贈匾曰至行維風

質行

元

韓海字伯通由韓村別居奇墅樂道好施扶危濟急有隱德嘗與石鼓寺僧石隱善寺圯為之修葺且置田以供香積石隱塑其像於北廊子銅為安遠令姪彥振洪武閒應賢良選

明

舒禎處仁尚義從弟早卒撫有遺孤舉鄉飲子元良旌獎義民

余福七都艾阮人愛濟貧困與人無爭捐貲築臨章門助

造雲巖橋有功

周晟事親竭力事兄如父創祭田新祠宇助婚嫁親賢課子尤爲所長

江社春二都人奉親孝事兄悌性直好善行表鄉閭

汪周榮三都人邑庠生廣東潮州府經歷遷鎮蕃衛經歷父喜周人急難周榮承父志貸不受償以券投之水弟多疾與之同爨友愛甚篤

汪周昂居家孝友雖富不驕焚券恤饑人尤德之歐陽明字旋甫七都人居家孝友宗族稱其仁讓

汪文英字世傑霞阜人八歲失怙上事大父孀母竭力敬養爲人解紛不惜貲財子時滿亦克敦孝友

程端莊字淨庵郭隅人敦篤懿行有古人風壽臻期頤舉鄉飲賓其裔文猷昌期爲庠序佳士

撒元時字亨宇城東人少失怙事祖母以孝捐貲贍貧舉鄉飲子士達爲上元縣佐有廉聲

汪廣蟾兄應虹不事生產廣蟾時供菽米兄無子爲之立繼而祭葬哀慕盡禮處鄉無競案牘無名再與賓筵

汪仲深字子洪幼聰敏好學父景明爲廣西布政司左參議卒于官仲深乃隱居養母克盡誠孝迨歿葬祭以禮事兄敦義讓知縣董舉社學學師多所成就

汪良琥字邦符霞阜人六歲喪父哀毀如成人事母甚謹嘗讀古今奢淫之戒必三復之生平衣不重帛食無兼味中年喪偶義不再娶

舒子儲字同野知縣希周子也性至孝重然諾仗義疎財失偶終身不再娶子榮都巡按湖廣儲諄諄戒以國爾忘家之義平生尤惜字紙封中書舍人晉封御史壽九十崇祀鄉賢祠

汪宗諒字貞吾七都人幼失怙奉孀母撫幼弟克敦孝友濟困不使人知貸金不索人償鄉里德之

孫顯爵字以德北街人師睦之裔秉性淳良克敦孝友施藥周急解紛息爭生平不惜貲費足跡不履公庭疊蒙旌嘉乾隆二十四年奉

旨崇祀忠義孝弟祠

范顯通城西人孝事繼母撫異母弟能竭力無怠

史時孫字南屏瑪川人五歲失怙事母以孝聞舉鄉飲

葉端葉立俱南屏人端以孝友聞立有高志言行不苟

汪瑞卿字君和霞阜人庠生痛弟有常及渙文早亡撫諸孤如己子父卒居喪盡禮先世所構遺經樓明經館先後

圮於水火命其子道岸會東營建世經堂以紹前休事詳都諫鄒守益墓誌銘其族人之深字原若弟恭默字思若

俱庠生幼失父事母克孝

史朝宗瑪川人以家有二親而會指日繁恐貽親慮乃使弟朝憲及長子臣習舉子業而身與弟朝京服賈所入以奉二親外餘俱均分

葉舜鼎南屏人元善次子事親竭誠友愛兄弟慷慨好義每捐貲爲人解紛雖百金不惜

汪子旻字敬溪少孤竭力奉母稍有所蓄遇饑歲則捐以濟眾恂恂有長者風

周大積字錦山城南人竭力事親義方教子

舒主裕字益甫築菴斐齋自娛樂道親賢爲儒流所重

歐陽良惠字隱泉梅源人幼失父養母以孝事兄以悌常捐金助建中天書院

汪子員七都人疎財濟困里人德之舉鄉飲

葉日綦字士美南屏人事親以孝訓後有方而友愛諸弟和族周隣鄉黨稱之

舒斌字錫予邑庠生稟性端亮器識宏遠治諸生業不沾沾帖括而喜談經濟崇禎十六年黔兵入祁門界肆行殺掠按院兵備諭各處堵截斌毅然率鄉勇合郡兵殲之晚見事不可爲遂棲遲東山之野徜徉終老焉

國朝

江天序字維綸號惇吾江村人性孝友博涉羣書隱居教
授著述甚富順治乙酉逆僕倡亂通邑奔竄序恬然坐鎮
莫敢少犯同時以好學力行著者又有胡拱成胡景舜余
騰名舒尙志廩生余貞增生許時賓
汪宗縉字元宰宏村人讀書明大義鄉黨窮而無告者周
給之善於教子長肇衍翰苑名臣次兆璋任廣東提舉有
政績

誥封奉直大夫

程永泰桂林人爲人溫良純謹性篤孝友值歲饑捐貲以
周族黨順治十三年闔邑舉善行申聞按臺獎賞

余季郁城西隅人居家孝友與人寬厚生平不履公庭而
能急公好義康熙癸卯張撫憲特行旌善給以扁額

舒雲鵬字廷南性孝友父沒哀毀骨立兄喪撫遺姪如己
子值歲荒賑粥戚屬有貧乏者傾囊施予砌路修橋捐貲
不吝中年失偶遂不復娶足跡不履公庭爲時所重

王邦祖江柏山人幼失父十歲時母病腹痛幾危醫藥罔
效邦祖號呼籲天灼艾于腹以分痛母疾旋愈及長爲人
謹厚端方樂行善事鄉里多德之同時有胡自舜胡祖舜
史昭理者俱以父亡能事其母友于兄弟見稱云

江宏字擴吾蓬村人生員事父孝撫四弟成立性好施有

義舉孫貢生洪福字養之性孝友言行端方

王懋賞字延季鮑村人邑庠生家貧教授生徒多知名士

所得館俸輒以周卹族鄰葺修祖廟捐置義田代族人償

逋糧凡濟人義舉力可為則為之知縣李公登龍深器重

焉刻有林厯詩集

吳連昭叢嶺人本汪氏子育於吳遂嗣焉吳汪俱衛籍連

昭運漕有籍分其子承汪嗣兩戶僉丁安之

朱正盛字恭卿朱村人康熙五十三年年九十二赴

萬壽千叟宴以齒居班首

溫旨慰問賜壽桃衣帶人參命回家以孝弟力田傳諭鄉

井

孫允壽字仁公古築人事親孝湖廣有業父理之允壽忽

夢父病往省至父果病越旬而卒允壽扶櫬歸事母不復

出友于兄弟敦族誼增祀祖立家塾曰養正堂

王圻字惟三邑增生兒時隨父入村塾欣戚必視父顏父

疾坐臥不離及沒哀毀骨立篤學力行為時推重自雍正

庚戌至乾隆乙丑五舉優生一舉孝廉知縣茅張警聘主

桃源書院書其姓氏於旌善亭時課文者沿桃源書院名

丁嘉詔字紫封三都人監生少孤事母以孝聞友于兄弟

不有私財動循禮法多義行鄉里爭訟者力勸止之或助

賁爲和解乾隆十七年移學宮嘉詔與里人汪之鵬任輸
納監造有業在祁門南鄉施茶湯設渡船行人便之

汪高字景嵩宏村人性孝好學重然諾見義勇爲恤貧贍
族時同族兆梁性亦孝友

李德倫字敘五雞頭山人九歲夫母父挈之江右刻苦力
學補弟子員且讀且商事繼母以孝聞江右士大夫雅重
之於其歸也簣山鄧夢琴爲序送之見藝文志

朱家麟字聖瑞朱村人監生少孤母葉氏苦節家麟淳謹
勤儉能自立焉

朱際會一名世淮字柏源朱村人敦行嗜性理書上見曾
祖下見元孫乾隆五十九年

恩賜七葉衍祥扁年九十六

葉宗華六都人居勒下父將析產宗華以己業質讓產於
兄父不許宗華待其姪有加焉先世積棺皆獨任之嘗焚
貸券寬債蓋有厚德者

方振聲厚善人貢生事母孝母程氏壽百有二歲貞壽坊
建西武嶺上

王起彪柏山人樂善好施性尤友愛其三弟幼撫之皆婚
娶而已至四十三歲始畢姻

韓嘉作字良臣十都人性剛直家廟及橋工皆輸助嘗爲

族人代納官糧

胡振科字殿舉西遞人性爽好義族人有所攜穢器臥其庭中而以逋賦爲縣吏繫去振科代償之得釋而某不知也歸臥振科庭中如故或告之始慚而去其隱德如此

舒日龍字在田屏山人監生性孝善事父及繼母父年老奉侍不離左右兄乏嗣以子承祧事嫂以禮生養死殮焉撫其弟常友愛備至羊棧嶺及石埭大洪嶺皆輸財督修至今行人稱頌之

胡良癸字于揆西遞人性敦厚事親孝族人貧無以殮者貲助之於路施茶湯僑居石山左右鄰災而良癸居無恙與父肇璵俱舉鄉飲及見五世云

吳希元橫岡人幼孤兄弟三人希元其季也既長念伯兄匡扶力四分家財以二歸伯兄希元嘗於潘山建神閣祀文昌而爲其父立主於後置碧雲菴供香火築書館立祀會置燈油田生平修橋梁焚貨券卒年九十六親見孫曾三十五人今黛嶺塔基亦其遺產所輸也

江庚朗江村人其兄生員世彰世彥皆登耄耋庚朗性孝謹好善鄉里稱之

項嘉文字郁侯二都人性孝友精於醫術能惠及人其子永恕字正懷嘉文瞽而永恕能得其歡心事繼母以孝聞

行亦淳厚

江尚濟字硯窗蓬村人生員事孀嫂撫幼弟以恭友稱時周里郟之急

林階字忠如章川人幼貧長而自立友愛樂善修道路輸造文昌閣援例得五品銜

江萬山字化一蓬村人生員母病足萬山朝夕負以出入居喪盡禮

葉文彭十一都人貢生孝於親無私財兄弟友愛嘗埋族中乏嗣諸柩

汪治字齊先六都人貢生立祀會與兄弟均有無嘗掩埋露齒子以德生員初承父遺資家能溫飽後漸貧恬然安之宿券亦不屑取

許允崇四都人性淳謹享年百歲

葉萼字輝五南屏人歲貢生嘗率族人禁佚遊知縣殷公濬哲旌以安分樂業扁跋云余初莅黟山采問風俗聞治南有葉氏四民各務本業絕不妄爲黟士請志之余畱心細察迄今五載不見村民片紙入公而士人更講求詩書益信人言不虛因樂表之以誌其里之美云今其族中猶守古風無佚蕩爭訟之習

葉宗春字元肇南屏人凌雲子也夫婦俱承志色養凌雲

亦稱之

金元位字素其金家村人兄久客母憂慮成疾元位朝夕不離母側及娶婦三日卽出訪其兄與俱歸母遂愈

程學彬字紹華桂林人州同銜性孝友好讀書族御貧不能學者袖金以資膏火施茶藥助殯斂建支祠及修路俱與之爲人言笑不苟人亦服其誠

舒崇本字大立屏山人歲貢生性孝友淳謹樂易近人見人美則成之惡則止之授生徒貧者束修之微亦不受

楊錫川字用舟八都人幼孤事大父母孝性沈靜年五十六始得子卒年七十九見二孫焉初其大父亡時絕而復

蘇曰文昌言汝五十六始有子其言竟驗

楊世和字祥遠八都人業賈數分財與弟姪

王士玫四都人學成衣藝母至九十歲色養不衰撫二弟一癡一弱爲成家不欲居讓產名遂同居焉

朱楫字利川朱村人生員性孝友或典衣負債以濟人急族有傳九世而嗣絕者楫教其輸產祠會得耐祭焉

李恒恥字勇如十二都人屋宇田園皆公之於兄弟立會祀族中乏嗣者

汪連萼宏村人業鹺於浙年二十喪偶以子託於嫂終身不娶亦無妾媵焉

程佛生字公尙桂林人性樸實無虛偽每節嗇衣食積餘貲以周人急又嘗修造城南門外大路遠近稱為善人

江名遐二都人幼失怙善事孀母友愛二弟見重於鄉里嘉慶二年舉鄉飲介賓

胡應詩西遞人立身端謹年登八旬親承祖父下見曾元嘉慶十四年

恩賜七葉衍祥扁同族有學淹者亦仁厚年登上壽五世一堂

恩賜粟帛三次入籍人業實堪表相與德汪沂字揚望郭隅人監生性孝友平生謹飭自守年八十

二上見祖父下見曾元前學師黃本騏旌以五世一堂扁

額時有湖洋坑人監生李尚淇循分安業善事父母與妻年俱七十餘二子七孫十一曾孫又見生元孫五世同堂因其人現存附註於此

王一相字首卿西山人家世務農一相業賈家稍裕撫二弟讀書讓屋於弟子繼鴻字子達邑庠生性淳厚事母孝嘗修霍溪路及三姑木橋

右質行

黟縣續志

道光五年

質行

明

舒福安字據德屏山人秉性純樸敦孝友守禮法兼通書史善文翰見義必為勇於急必明洪熙元年因輸餉京都歿於采石舟次其後裔繁衍登甲乙科膺顯秩論者以為篤行之應

國朝

程繼斗一都人府舉鄉飲賓品行端方樂善不倦其事實載程氏人物志康熙三十七年太守范公贈匾曰德隆望

重

汪漢字紀南黃陂人稟性方直儀觀峻整當事持議守正不阿而出以和婉人皆敬信聽從治家嚴肅家故饒裕析產田宅取其中下奴婢取其老羸者重義輕財中年以後漸替不入市廛不干外事滋蘭種菊以自娛壽至九十餘歲

胡純駒字思白橫岡人邑諸生性孝友事繼母如所生弟驂早卒撫養孤姪恩勤備至工詩文善書法教授生徒規矩嚴肅以變化氣質爲務家貧至採野蔬以佐饗殮或有以非義之財干之者輒掉頭不顧其耿介尤足尚也

傅廷照字亮臣石亭人平居謹慎習勤勞睦親族尊崇師道族鄰子弟中有俊秀者必勉以誦讀矜孤恤貧代完國課建亭修路解紛息爭舉鄉飲介賓

江錦泉字蜀文二都蓬廈人邑增生品行端方學力純粹里居授徒列黌宮者數十人泉支祖鐔公祀會曾充社長經理侵蝕泉出穀六十石償人本村溪水泛溢衝壞熟田數百畝泉率族人鳩工疏通至今里人猶利賴之



